

Illoqarfigisaq qimallugu erniartortartut ilaqutaasalu, unammillernartumik atugarisaat pillugit qulaajaanermik iliuusissatullu pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut UKA24-p aallartinnginnerani saqqummiunneqarsimassaaq.

(Inatsisartunut ilaasortaq Mikivsusuk Thomassen, Inuit Ataqatigiit)

Akissuteqaat

(Meeqqanut, Inuusuttunut, Ilaqutariinnut Peqqissutsimullu Naalakkersuisoq)

Siullermeerneqarnera

Naalakkersuisut siunnersuuteqartoq, Mikivsusuk Thomassen, Inuit Ataqatigiit, erninermi iliuusissatut pilersaarusiortoqarnissaa pillugu Inatsisartut aalajangiiffigisassaattut siunnersuutaanut qujapput. Naalakkersuisunit paasisinnaalluarparput naartusoq illoqarfimmut allamut erniartorluni aallartariaqaraangat ilaqutariit annertuumik isumatsaqqasinnaasarmata.

Ukiuni kingullerni Peqqinnissaqarfik sulisussarsiornermi - aamma sulisut sulisoriinnarneqarnissaanik annertusiartortumik unammilligaqarpoq. Pingaartumik assersuutigalugu nakorsat immikkut ilisimasallit pilattaanermik misilittagallit imaluunniit tassangaannartumik erninermi ajornartorsiutinngorsinnaasunik isumaginnissinnaasut atorfinitsinnissaat ajornakusoorsimavoq. Nunatsinni sumiiffinni arlalinni erninermi upalungaarsimanissamut pisariaqartut ingerlatiinnarnissaannut sulisussarsiornermi unammilligassat pissutigalugit ajornakusoortitsivoq.

Taamaammat Naalakkersuisut erninermi sullissinermi periarfissat killissallu ilisimasaqarfiginerulernissaat anguniarniarlugu misissuisitsinermik aallartitsipput. Ernisarnermik suliallit naartusullu ilaqutaat ernisarnermut sullissinermi periarfissanut killissanullu tunngatillugu isumaat misissuinermi tunngaviussapput. Ilaqutaasut aamma ernisarnermi suliaqartartut tunniussaata ineriartortitsinissamut aamma pisunut assigiinngitsunut misissuisinermi saqqummiunneqartussanut, nunatsinnilu ernisarfinnut isersinnaanerup siunissami pilersaarusiortifiginissaanut aaqqissuunnessaanullu atorneqarsinnaanerannut tunngavileeqataassapput.

Qulaani pineqartut aallaavigalugit Naalakkersuisut naliliipput oqaluuserineqartumut tunngatillugu iliuusissatut pilersaarut misissuinermut ingerlanneqartumut pissusissamisoorlumik malittaasinnaasooq. Tamanna ilutigalugu Peqqinnissaq pillugu ataatsimiititaliarsuup isumaliutissiisutaa qanittumi saqqummiunneqassaaq. Peqqinnissaq pillugu ataatsimiititaliarsuup erninermi sullinneqarnerup aaqqissuunneqarnera pillugu innersuussisimappat, innersuussutit iliuusissatut pilersaarummut tapertaataassapputaaq.

Taamatut oqaaseqarlunga Naalakkersuisut siunnersuut taperserpaat Inatsisartunilu ilaasortat oqaluuserisassaaq eqqartorluaqqinnissaanut kissaassipput.